

LUNARI pal 2005



Odilo Sartori

“Odilo Muini”

Odilo marcantin, Odilo cjaliâr, Odilo muini e ancjemò Odilo da pompis funebris. Lu à clamât in tantis di che manieris culi a Romans, ma al era simpri lui, al nestri cjar e complant Odilo Sartori. A nus à lassât l'altri an cun dut al sò grant orgoi di jessi partignût e di vê dât continuità a una antiga e onorada famea di fedêi sacrestans. Mi lu faseva simpri presint ogni volta che vevi ocasion di la a cjatalu intal sò ufizi, lant a Frata. Prima di dut, par altri, mi domandava simpri ce mût che si compuartava la Pro Romans, altra granda passion da sò laboriôsa esistenza. E fevelânt di "football" prima a mi contava di cuant ch'al era stât dirigent dal Romans e po dopo, ae fin dal nestri discors sportîf, a nol manciava mai di fami presint che al sarès vignût plui che vultintâr a viodi lis partidis da Pro Romans, ma metint una man da banda dal cûr al mi diseva suspirânt: "o ài masse paura, par altri, che chest no resisti ae emozions". Dopodichè al colava simpri ta che, val a dî sui sò lontans antenâts, che jerin rivâs a Romans da Toscana e par diviars secui a son stâts fedêi sacrestans da glesia di Romans, cuant che - al zontava ricuardant la so lungja mission, - fa il muini al cumpuartava veramenti tant impegn e tancj sacrificis: bisugnava tirâ la cuarda da cjampanis tantis voltis in dî, se creditu - a mi diseva - pai matrimonis, funerai, batisims e ancjamò altri, cussì tant che bisugnava cjariâ ogni dì l'orloi, tignî neta la glesia, meti lis rosis, impiâ lis cjandelis, servî messa e lâ daûr al plevan un pôc par dut, cuant ch'al lava a binidî lis cjasis e in tantis altris occasions. E tal dimi dut chest a gi si impiavin ogni volta i voi di tanta ligria, sodisfazion e orgoi par vè onorât propi ben al non da so famea e mantignût viva la tradizion dai Sartori come sacrestans. Sùbit dopo, par altri, al cjalava sò fi Franco, cal jera lì vissin, e sot vòs, cu na punta di vîf displasè a mi diseva, cuasi che al ves volût scusasi viodint che stava vignint mancul la tradizion da so famea: se utu vuê i timp a son cambiâts e Franco a nol pôl mica bandonâ al sò lavôr par lâ a servî in glesia. Peraluis ditis cun scleta comozion, che gi rindevin grant onôr e mi fasevin capî al sò infinît amôr pa glesia di Romans e lafiet ai soi lontans antenâts. Dovin ricuardâ, dinfat, che i Sartori o son segnalats come "nonsoli" sui libris parochiâi di Romans fin dal 1685, an ch'al è nassût Nicolò Sartori (fi di Pieri Sartori di profession tessitôr) e dopo di lui i discendents Leonard 1713, Pieri 1746, Zuanbatiste 1773, Pieri 1796, Josef 1827,

Julio 1861, Pieri pari di Odilo, ch'al è nassût tal 1894 (chest nol figura però segnât come "nonsolo" sul libri parochiâl, ancja se in paîs lu clamavin Pieri muini), daspò Odilo istès, vignût al mont intal 1925 e ancjemò zovin al à scomenzât a servî in glesia, mentri come mistîr al à prima fat il marciadant di vâcjs a flanc di so pari, mentri plui tart al è diventât un cjaliâr talmentri brâf che in timp di vuera i todescs, ai cuâi i cusiva lis scarpis, orevin partalu cun lôr in Germanie: al à dovût scjampâ a Triest par platas, se no al fôs diventât ancja lui un "schumacher". Ma la reson pal cuâl Odilo cuistât un puest di onôr e di prin plan in te storia dal nestri paîs, al resta chel leât ae sò figura di fedêl sacrestan al servizi da glesia locâl. Un compit par nuia fazzil - al diseva lui - un compit intrigôs - zontin noatris - considerant che te funzions dal muini figurava in passât ancja che di procurâ i zagos, veramenti teribii in chei timps, disponibîi in grant numar cuant che si tratava di servî messa in ocasion di gnocis o batisims, indulâ che si poteva tirâ sù cualchi palanca o a la plui sporeja una grampada di confez, mentri pal rest al era pardabòn dificoltois ingagiâ cuachidun e ancjamò di plui bisugnava stâ atents di lôr, soredut cuant che servivin messa e cjapavin in man al turibul: spès a rabaltavin lis boris sul tapêt riscjant di lassâi la busa.

Un impegn di sigûr gravôs, chel che il nestri Odilo muini, simpri educât e tant rispietôs tai confronts di ducj, si à cjariât su lis spalîs par tancj e tancj ains. Un impegn che il nestri "Bonsignor" Galupin al à orût ricognossigi tal moment che, di sò sacheta, gi à paiati il viaç di gnocis, che il puar ma onest Odilo nol podeva, magari cussì no, permetisi.

Un agrât che ducj noatris romanes dovarin tignî simpri presint tai soi confronts, e di chest dovin ringraziâ chista volta il grop dai "I Scussions", che chest an al à orût dedicâ la cuviartina dal lunari al nestri complant muini.

Grazie di cûr Odilo.

Edo Calligaris